

LOU BRUSC

JOURNAU POUPULARI DE LITERATURO, D'ISTORI E DE SCIENCI

PAREISSÈNT TOUTEI LEI QUINGENADO

Depausitàri majourau pèr Marsiho : *A la Librairie des Bons Feuilletons*, 50, carriero de la Darso 50

Abounamen :
3 fr. e mié pèr an pèr touto la Franço.
Fouero Franço, lou port en subre, ço
que reyèn à 5 fr.

Tout ço que toco lou journau dèu
èstre manda afranqui à l'Empremarié
Prouvençalo, 15, carriero d'ou Grand-
Relògi, à-z-Ais.

Lei plé noun afranqui saran refusa.
Leis article noun inseri saran pas
rendu.

TAULETO

- PASSO-TÈMS. — Li carretié - *F. Mistral*.
POUESIO. — Lou printèms - *E. Jouveau*. —
Araù - *Marius Bourrelly*. — Fablo - *M. Barthès*. — L'antic Carcassouno - *P. Gourdou*.
REMEMBRANÇO. — D'ou 14 au 27 de novèmbre.
— *L. A. Gardaire*.
CROUNICO. — Necroulougio : Sylvain Saint-
Etienne; Henri Olive. — L'armana prouven-
çau LA'tenèu de Fourcauquié.
FURIETOUN. — Pèire de Prouvenço e la bello Ma-
galouno.

PASSO-TÈMS

LI CARRETIÉ

I

Vous n'en rapelas pas, vous-àutri que sias jouine, de i'a trento o quaranto an, avans que l'aguèsse li camin de ferre! Ero lou tèms di carretié, di roulié, di carrioulaire, que tenien li grandi routo e que li cresien siéuno, e fasien peta soun fouit, de Marsiho à Paris, e de Paris à Lilo en Flandre.

Ah! falié veïre acò, vers lou pont de Bon-Pas, o à la visto de Marsiho, sus aquéu grand camin de 24 pas de large, li falié veïre, aquéli tiero de carreto cargado, de carriolo tendado, de brancan ben biha, que se toucavon tóuti, aquéli rengueirado d'atalage superbe, equipage de tres, de quatre, de sièis bèsti, que davalavon sus Marsiho o que mountavon sus Paris, carrejant lou

blad, lou vin, li saco de civado, li balot de merlusso, li barrielo d'anchoio o li bard de saboun, balin-balou, patin-patou, e à la garaï de Diéu, coume dision alor li letro de carré.

Em'acò, quand travessavon un vilage, de vermenié d'enfant se pendoulavon à l'esperro e se fasien tirassa à la co de la carreto, enterin que lis autre cridavon : *Darrié, darrié, carretié!*

II

De liuen en liuen, long de la routo, l'avié pèr la dinado, pèr la soupado e la couchado, uno aubergo celèbro, emé sa bello oustesso à caro riserello emé sa grand cousino e sa grand chaminèio, ounte l'asti viravo de porc tóuti entié, emé soun pourtau à brand, emé sis establarié vasto coume de glèiso, ounte s'esperlougavon dos renguiero de grüpi, e mounte à la muraïo l'image acoulouri de sant Aloi èro empega. Aquéli cabaret s'apelavon la Graïo, Saint-Martin, lou Lioun d'Or, lou Chivau Blanc, la Miolo Negro, lou Capèu Rouge, la Bello Oustesso, lou Grand Lougis, que sàbe iéu? E se parlavo d'éli à cent légo à l'entour.

De liuen en liuen, long de la routo, l'avié de bourralié qu'avien per mostro un coulas nou, de roudié qu'au besoun rebihavon li rodo, de manescau bouchard que pèr ensigne avien un ferre de chivau, de pichot boutiguié que, darrié soun vitrage, penjavon de paquet de chasso pèr jou fouit emé de capèu de pipo, e de pichòti begudo qu'avien davans sa porto un trihas tout blanc de pousso, ounte li carretié venien béure pèr un sòu sa gouto d'aigo-ardènt.